

Nehemaya

Ero Bi Nehemaya Kake No

¹ Ntoora nnyo mi Nehemaya mmona Hakaliya nyi a: Go nnyahng mi bo kpo lung re Kislev, eji kp'biingi nnya eltahl nyi ntula Ataseses kun no, n jolo go Susa abuntahk nya Elam

² Hanani mmonannee awohng kehm lohngo go Juda ba a aneblum bako, owo m bahbe bo ana erik anebe Ju bako bo ji ki kpo go eju, tob bahb bo bada Jeusalem.

³ Bo kehm-m tongo re, <<Ane ba je eju ba kpeka li go elkpin, bo ji ma feere kehng go ejang Juda, bo wob egburu ntong a esono. Ekahme ji Jeusalem ebbakke gbo, wo ati mbu enye bob jahm agun fi.>>

⁴ Eji n wuku nsol nyia n sa ji ndi jo ling. Go abon afung, n ji ndon ndon jo bade njal, jo kak ero go esamahr Esowo bi ejahbetul.

⁵ Owo n kehm bungu re,

<<Jehova, Esowo bi ejahbetul, a kp'gbale fere m'menng, a kpo bum nwongo enya nyi elkoro a ane ba a kpi bo kor, fere jo bum atahm enye,

⁶ lennge atung enya, wo fere lennge amahr enya wuk ero bi nlokeltum ewa kp'kake ega esamahr atv a njul ka alokeltum eba, anebe Israel. N kp'fvrvr abiafem nya wahr Isreel e ma lim bade a na, me n wob atahng, a etahk nsoo.

⁷ Wahr eblim ab'bi nya sahb s'sab bada na. E kpunem elkahn, ajehke, atahm, enya nya a ka Mosis nlokeltum ewa.

⁸ <<Buumu elle ni a ka Mosis nlokeltum ewa re, <N' tohk-m jo toono a ntim a ntim enyahne, m bahk-n kame faade go agburu ajahbe nyako,

⁹ wo n l'feere ba go egame fere ba bum atahm enyame, jola afi bo rodo ane ebahne kak eju go nkpohka njini nyi sahb l'li fee, m bahke kuku bo bum edi ajehng, feere a bo, ba rehng a bo go edi ji m ma yehke re mbing enyame jol o.>

¹⁰ Bo alokeltum eba ba, a ane eba, ba a limi bo for go ega egburu eko a etahntahn ebo eba.

¹¹ Jehova lennge atung enya, wo wuk ero bi nlokeltum ewa, a aro nya alokeltum eba ba kpo kor bo re bo kpunu mbing enya. Lennge mbang ka nlokeltum ewa lela, eji ntul l'tib-e ndon enye.

Ngare nyio me wo jolo nfakamahm ka ntul.

2

Ataseses Tumu Nehemaya Tv Go Jeusalem

¹ Go nnyahng mi Nisan, eji kp'biingi nnya eltahl nyi ntul Ataseses kun go ejahbe, Eji bo ko amahm ba, me wo taare fa ka ntul. Wuku wuku n ka g'guunu go ege esamahr.

² Ntul kehm-m bahbe re, <<N'nan esamahr eba kp'guunu ano, eji a kil yame na? Ejumjum sang, eltim ni kp-a gbiingi.>>

N bele elfahle gbalee,

³ wo n kehm tongo ntul re, <<Nong ntul kang aya tvv! N'nan esamahr ebame l'k'jol ndon ndon, eji ejahbe ji bo kpa babnsoo kak ma ranng kpee, ati mbu enye bobjahm agun kpee fi?>>

⁴ Owo ntul kehm-m tongo re, <<Anv, ejum ajii a kp'sebe?>> Owo n kehm kake ero tong Esowo bi ejahbetul,

⁵ fvfo n fere faange ntul re, <<L'fere kor ntul, l'jol re ntul atahng me-e yebe tob-m, me nlokel-tum ewa, nong ntul tum-m tv mfam ejahbe ji Juda, edi ji bo kpa babnssoo kak, eji n l'song tuungu si.>>

⁶ Owo ntul, ngare nyia nkal ewe jehk-e go nkpe ebrudu, ntul kehm-m bahbe re, <<Bahk kange renan ji a bahk koko rehng o? Ngare anyii a bahke feere ba?>> Eji yebe ntul atahng re á tum-m; owo n kehm-e kake ngare.

⁷ N kpe tong ntul re, <<L'fere kor-e, á yeele nwer ka-m, me n song ka atubesi ejahbe ba li go erede bio bi aya ma Yufritis, eji bo l'tv-m, n l'k'bel elgbiingi eltim mbang mbang tete n rehng go Juda.

⁸ Tob ka-m nwer, me n song ka Asaf ji kpo kpur ekulugbe ntul, eji á l'ka-m ajangenti nya m bahke koko lim ago si ati mbu nya ekpukpa nsol ebta kohlo etahk Esowo, a ekahme nya mfam ejahbe, go etahk ji m bahke woomo.>> Tib eji nnoobo ebo Esowo jolo aname, ntul limi nsol nyia kpee nyi m bahbe no.

⁹ Ano wo m ba rehng goji afili ejahbe ba li go erede ejang aya ma Yufritis, m kehm ba faake awer ntul ka bo. Ntul tob kake atubesi nsoja a abafingi any'nya ba jolo aname jo baab-m.

¹⁰ Ngare nyi Sanbalati nnea Horon abola Tobaya ji nnea Amon, bo ji jolo atubesi ane wuku bada jia, jo gbiingi bo eltim sehng re nne ebba re á ba lim ji bahke kake anebe Israel ebo.

Nehemaya Song Feede Ekahme Jeusalem

¹¹ M ba rehng go Jeusalem. Eji m ma kang o
nfung era

¹² n kehm mehle atv a ane abik abik. Ngare
nyia nnene n ka tong ana ji Esowo ebame ma-
m kak go eltim re me n lim ka Jeusalem. Enyam
jolem bi e jo fing, sehngem nyi n jo fing yanng
nyi.

¹³ N lohngo atv sehng go eti mbu ji jolo go
edamme, a Elbing Alahb Edragon, sehng song
rehng go eti mbu ji Abahng Enyam. N jo feede
akahme nya Jeusalem, nya bo ma wa, a ati mbu
nya ma fi agun.

¹⁴ Owo n kehm mehle asongo eti mbu ji Mb'behl
Alahb, tob rehng go Eto ji Ntul. Wo nnyam nyi n
kuumu no maam sehng tib eji ekahme ma gbo,
edi elludu jolem;

¹⁵ ano wo n tahme go edamme ngare atv, jo
feede akahme. Es'kohro n feere njahm, fere ba
tuungu sehng yel go mfam nyi nnen go Eti Mbu
Edamme.

¹⁶ Jol atubesi abalimeltum kahnem edi ji n
lohngo no tahm, afi ejum ji n jo l'limi, tibre
ngare nyia n ka tiki bung ejum ajehng ajehng
tong anebe Ju, afi abalimajom, afi atubesi ejahbe,
afi atubesi abalimeltum, afi nne awohng awohng
noko no bahke jo lim eltum.

¹⁷ Owo n kehm tongo bo re, <<N' kp'nyehne
elkohn ntong nyi e ma yel: Jeusalem ebranng
kpee, Ati Mbu enye ebfi go agun. Baan, wahr
tuungen ekahme Jeusalem lang, eji l'k'kpe jol
esono ka-r.>>

¹⁸ N tob tongo bo bada nnoobo ebo bi Esowo ebame bi jolo aname, a ejum ji ntul tong-m no. Bo kehm-e faange re, <<Nong wahr bomen ekahme mfam ejahbe go ellange. Ano wo bo bomo nnoobo eltum nia.

¹⁹ Wo eji Sanbalati nnea Horon, Tobaya ntubesi nnea Amon, a Gesem nnea Arab, wuku bade eltum nia, bo kehme elnyoko, fere jo wol-r. Bo kehm-r bahbe re, <<Ejum a ji a ji n kp'limi? n yahke lim etahnsi esamahr ntula?>>

²⁰ Owo n kehm faange bo re, <<Esowo bi ejahbetul bahk-r kake ebo e lim eltum nia mal. Wahr ji li alokeltum ebe bahke bomo eltuungu ekahme lang, wo ana wahn, ebo abehng abehng n kpimm go Jeusalem, eko ajehng ajehng a kpimm, jol eka ji bahke tibi bade a na, a kpimm go Jeusalem?>>

3

Bo Tuungu Ekahme Jeusalem Lang

¹ Eliasib nlimanjom no ga wahre, a abalimajom ebe ba bo kpo lim eltum ano, song bomo ekahme asehke, bo tuungu Eti Mbu Ejoro. Bo yake kak Esowo go ebo fere kak abutahk. Bo si ekahme ano tete song rehng go nkahmbungubungu etahk Atahl Alon, ji bo tob yake kak Esowo go ebo. Bo soro asi go elsehke tete song rehng go nkahmbungubungu etahk ji Hananel.

² Aneblum Jeriko jo lange toono Eliasib, wo Jaku mmona Emiri jo lange toono bo.

³ Abon ba nlum ba Hasenaa ba lange Eti Mbu nsahre. Bo ba kunu akporti, kak abutahk enye, kak Adon, fere kak nti esiki mbu.

⁴ Meremoti mmona Uriya, mmona Hakuji ye wo tuungu edi ji jolo etoono edi jio. Mesulam mmona Berekiya ji mmona Mesejabel, wo toon-e, tuungu adi, no toon-e no Jadok mmona Baana tob tuungu adi nya ma ranngé.

⁵ Aneblum Tekoa ba tuungu etoono edi, wo atubesi ane ebo joom seb re bo lim eltum go elwo ni ane ba jo tv bo go eltum.

⁶ Joyada mmona Paseya a Mesulam mmona Besodeya bo ba tuungu Eti Mbu ji Jesena*. Bo kunu ebti siki go ero, fere kak abu , a Adon, a ebti mbu abame.XXXXXXXXXX

⁷ Ane ba toono bo, aneblum ba lohng go Gibion a Mijipa, Melatiya ji Gibion, a Jadon ji Meronoti, adi nya jolo go elwo ntul no jo fili erede aya ma Yufritis.

⁸ Ujijel mmona Harhaya, ji nne etahl go ellong abatahle etahl agul, wo tuungu ejang ekahme ji toono jio; Hananiya ji jo lim akehng es'svv, a tuungu erohko edi toono jio. Bo tuungu ejang ekahme Jeusalem mal, tete song rehng Ekahme ji Kp'kpange.

⁹ Refaya mmona Hur, ji jolo ntubesi go erohko ejahbe Jeusalem, tuungu edi ji toono jio.

¹⁰ Jedaiya mmona Harumafi tuungu edi ji jolo songosongo wane etahk eje, Hatusi mmona Hasabneya tuungu edi ji jolo kohl-e.

¹¹ Malkija mmona Harim a Hasub mmona Pahati Moab tuungu erohko jehko, fvfo a nware wahre edi ji kpi egbakohk abred.

¹² Salum mmona Halohesi, ji jo fili erohko ajehng a l'yab Jeusalem ejang abbal jangjang

* **3:6 3:6** Jesena, Nk'kulu Eti Mbu

tuungu ekv j'je toono bo, abon ebe ba nkal ba tob-e.

¹³ Hanun a ane ba lene go Janoa, ba tuungu eti mbu edamme. Bo tuungu lang fere kak ebil, a eti esiki ntem. Bo tob tuungu ekahme, labe ntahme atahltahl nkpel ebal atahl awubu song rehng go eti mbu abahng enyam.

¹⁴ Malkija mmona Rekab wo tuungu, eti mbu abahng enyam. ye ji jo fili erohko ejahbe ji bo jo lung re Beta Hakerem. Á tuungu ati mbu nyao, kak abu, fere kak mbil a, eti siki mbu.

¹⁵ Salum mmona Kol-Hoje ji jo fili erohko ajahbe i bo kpo lung re Mijipa wo tuungu eti mbu ji Elbing alahb. Á tuungu si, fere konngo elbulu go ero, fere kak abu, fere kak mbil a nti esiki mbu. Á tob tuungu ekahme jio ji eto Silom, nkpe nyio nyi etahngga ntul tete rehng go agbahk nya toono rehng go ejahbe Devid.

¹⁶ Go ege a mbuksong, Nehemaya mmona Ajibuk wo, ye ji jo fili ejang ejahbe ajehng a l'yab go edi ebbal, ji bo kpo lung re Beti Jur, wo tuungu lang ekahme, tete rehng go edi ji li wane go eyale ji Devid, sehng o rehng eto ji bo limi no, a etahk ji atahntahn anebe nta ba kpi egahme li nno.

¹⁷ Ane ba kpe toono tuungu edi, anebe Levi ba jo lim eltum go elwo ni Rehum mmona Bani. Ege ejang, Hasabaya ji jo fili ejang ejahbe ajehng a l'yab go ejang ebbal, ji bo kpo lung re Keila, ba tuungu lim eltum ka erohko ejahbe eje.

¹⁸ Ane ba toono no tuungu edi, anebe ejahbe eje Levi, ba tuungu edi, go elwo ni Binuyi mmona

Henadad, ntubesia nne no jo fili ejang ejahbe jehko ji Keila.

¹⁹ Ane ba toono bo, Ejeri mmona Jesua, ji jolo ntubesi no Mijipa wo kpe toono tuungu ejang ekahme jehko, eji a kp'tahme edi ji bo kpo kuuru nsol ebta tete rehng go nkpohko ekahme.

²⁰ Nne no toon-e no, Baruk mmona Jabayi, go ekor, kpe tuungu edi jehko, bomo go nkpohko tete song rehng go mbuga etahk Eliasib, nlimanjom no nnen.

²¹ Nne no kpe no, Meremoti mmona Uraya, mmona Hakoji, tuungu erohko jehko, bomo go eti mbu ji etahk Eliasib tete song rehng es'kohlo ekahme.

²² Abalimajom ba jolo abon ajahbe ba sennge bo kak, ba kpe tuungu edi toon-e.

²³ Go ebo es'song, Benjamin a Hasub tuungu ekahme ji jolo wane go eboa mbuksong etahk. Ane ba toono bo, Ajariya mmona Maaseya, ji mmona Ananiya, tuungu kohlo etahk eje.

²⁴ Nne no kpe toono, Binuyi mmona Henadad tuungu edi jehko, bomo go etahk Ajariya tete song rehng go elgahle ni li go nkpohko ekahme.

²⁵ Palal mmona Ujayi, á limi eltum songo songo wane nkpohko nyi ekahme a nkaumbungubungu etahk, rehng ekpasiki ji kp'wahre kohlo nlaaga abab'baabe. Nne no kpe toono, Pedaya mmona Paros,

²⁶ a alokeltum etahk Esowo ba lene go ewong Ofel, tuungu tete rehng edi ji li wane eti mbu alahb, asongo ero nfam a nkaumbungubungu etahk.

²⁷ Ane ba kpe toono, aneblum ba Tokoa ba tu-

ungu erohko edi jehko, bomo go egburu nkahmbungubungu etahk, tete song rehng go ekahme ji Ofel.

²⁸ Ero bio bi Eti Mbu Eny'nya, abalimajom tuungu adi, no nne go mbuksong etahk eje.

²⁹ Nne no toono bo, Jadok mmona Emeri tuungu songo songo wane etahk eje. Nne no toon-e no, Semaya mmona Sekaniya ji jo baabe eti mbu ero nfam, wo tuungu edi.

³⁰ Nne no toon-e no, Hananiya mmona Selemaya a Hanun, ye wo biingi abon arakera ba Jalaf, bo ba tuungu erohko ekahme jehko. Nne no toono bo, Mesulam mmona Berekiya, tuungu edi songo songo wane etahk eje ji á lene no.

³¹ Nne no toon-e no, Malkija, ye ji jolo nne etahl agul, tuungu edi tete rehng go etahk ji alokeltum etahk Esowo, a abajenare, ji wane eti mbu ji ane feede, tete song rehng go eksp'kpa eyong, ji li go nkpohko.

³² Elka elka ni eksp'kpa ji li go ero enyong ji li go nkpohko, a eti mbu ejoro, anebetahl agul, a abajenare bo ba tuungu.

4

Enok bi jolo go ellange Ekahme

¹ Eji Sanbalati wuku re e kp'tuungu ekahme lang, á bele egburu erakatahng, á jolo go erakatahng eltim jo gbiing-e gbiingi, á kehm kehme anebe Ju nyok.

² Á kehm bungu a bo, go esamahr ane ba bo kpo lim eltum ano, a nsoja nyi Samaria re, <<Jenji awon Ju nyao kp'limi? Bo kp'tiri re bo kpe tuungu

ekahme langa? Bo kp'tiri re bo lim ajoma? Bo bahke limi eltum nia mal go efung abehnga? Anv bo bahke yehke atal etahk asehke go abim nsol nya ma fia?>>

³ Tobaya nnea Amon no yiimi kohl-e kehm bungu re, << Ekahme atal ji bo kp'lange o jol mbehr l'wahr bahke gboko!

⁴ N kehm kake ero re, <<Esowo ebahre wuung-r atung, ane ma-r sennge njahm. Sennge enyok ebo fere kuumu go ebo asi. Faake bo ka ana ejum eldake go ndi nyi bo bahke woomo eju.

⁵ Ka bulu ebi ji bo ma li, afi tahm ka bo go ebo abiafem ega esamahr, tibre bobnyok abalange ekahme go ebo esamahr.>>

⁶ Ano wo e soro asi jo lang ekahme, tete wahre rehng ekvkv, tibre ane jo limi eltum a ntim a ntim ebo.

⁷ Wo eji Sanbalati a Tobaya, a anebe Arab, a anebe Amon, anebe Asidod wuku re, ekahme Jeusalem ji e kp'tuungu kp'wahre asongo, fvfo ayake nya jolo no, bob kehme eltuungu lang sahd, bo bele egburu erakatahng.

⁸ Bo kpee kehm toobo egom egom re bo ba ba nok a Jeusalem, fere lim ntong a bo.

⁹ Wo e kake ero ka Esowo ebahre, fere kak mbaabe atv a njul, eji bahk-r tobo go ntong nyia.

¹⁰ Wo gana, anebe Juda ebbung re, <<Eko ebtan abalimeltum, wo nsol nyia gbalee nyi ma bud; e nehm ma tuungu ekahme jia lang.>>

¹¹ Fvfo anebekv ebahre tob bungu re, <<Re bo kehm kahne afi nyehn-r, bo bahk-r nyehne go ebo ellong, kpi bo wul, wahng ka, eltum nio bahke rahke.>>

¹² Anebe Ju ba lene kohlo anebekv, jo ba tong-r sehng nkpele ewubu re, <<Edi ajehng ajehng ji n senng no, bo bahk-r ma bohko abohng ejang abehng abehng.>>

¹³ Ano wo fvfo n kehm bumu ane go njahm ekahme nyi sahb r'rede adi nyao nya jolo gbuul, n jo bumu bo mbaabe go ebangenahb ebangenahb, no nne ekahngkahng, a elkong, a mban.

¹⁴ Eji m ba seenge ana nsol kp'jeke, n kehm mehle yiimi, kehm bungu tong agburu ane, a ane ba kp'fili adi, a erik ane bako kpee re, <<Kana fahl anebekv ebahne. Buumen Jehova, ye ji kp'gbale, fere m'menng, wahn nok ka abangenahb enyahne, abon ebahne ba nlum a ba akal, akal ebahne a ntahk a ntahk enyahne.>>

¹⁵ Ana anebekv ebahre sebe kahn re wahr ebkahn ebi ntoobo ebo, fvfo ana Esowo ma lim ma bil bo amahr, owo wahr kpee kehm feere, no nne go edi ekahme ji a jo lim eltum.

¹⁶ Bomo efung bio asongo, n yabe ane ebame ejang ebbal, ane bako jo lim eltum, bako fili nsol ebta ana nkong, akum, mban a nsol ebta nyako. Atubesi yehke elbo yiimi go njahm nyi anebe Juda kpee,

¹⁷ ba jo lang ekahme. Ane ba jo sol nsol eltum, jo solo ebo abehng, fere jo fili ejum ebta ebo behko,

¹⁸ nne awohng awohng no jo lang gbade ekahngkahng go ebun ana á jo lim eltum. Wo nwora ntang jolo aname.

¹⁹ Owo n kehm tongo agburu ane, a atubesi ane, go erik ane re, <<Eltum nia kp'gbale, fere ny'nyange, ga e li tang tang tang go ekahme.

²⁰ Edi ajehng ajehng ji í l'wuk ntang ma wor, been ba kpir-r o. Esowo ebahre bahke noko ka-r! >>

²¹ Ano wo e soro asi go eltum, egom ane bako fili nkong, bomo efunfu behre behre tete ngare nyi alonlo ma lohng.

²² Ngare ny'nehm o n tob tongo ane re, <<Nong nne awohng awohng a nkake ebo ewe jo jol atahng Jeusalem atv, eji bo bahke jolo abab'baabe go atv, fere jo lim eltum ngara njul.>>

²³ Jol me, abonanee, aneblum ebame, afi abaaba adi ba jolo aname, e tikem yehke nsol ebjing enyahre, no nne fili ejum ebta, jol afi fere jolo re á je alahb tuk.

5

Nehemaya Kake Akpak Ebo

¹ Ngare nyia egom aneblum, a akal ebo, kehm kehme elbungu bada abi nsol nya Ju abonanyehn ebo kp'limi.

² Egom jindiki jo bungu re, <<Wahr, a abon ebahre ba nlum a ba nkal, e kp'ruru; re wahr kehm lehke nsol fere jol go elkpin, e bahke tiki bel nkohl ellehke.>>

³ Bako jo bungu re, <<Wahr ebrod ebgbe ebahre, ndi egbe agreb, a ntahk enyahre yahke, ko nkohl ngara njal.>>

⁴ Egom jehko kpe bung re, <<E bongo na akpohko song kpi etak ntul, ji ndi ebgbe ebahre, a ebgbe agreb.

⁵ Jol eji wahr kpee, e lohng ebangenahb ajehng, abon ebahre kp'tob nob ana abon ba bo. Wahr ebrob abon ebahre ba nlum a ba nkal kak eju.

Abon ebahre ba nkal bandiki ebsi y'yel eju, wo eko wahr lim, tibre ndi egbe, a ebgbe agreb fere li ka ane bako.>>

⁶ Eji n wuku aling ebo, a abi nsol nya bo tooro no, atahng rak-m s' sehng.

⁷ N tiri bada nsol nya go egame atahng, kehm kake agburu ane, a atubesi ebi. N tongo bo re, <<N kpo ko ane ebahne nsehng gb' gbal, n l'bong bo akpohko. Owo n kehm lungu egburu nkon eji bo kpee l'bung bada nsol nya,

⁸ fere tong bo re, "Ana e male no, wahr ebnok feere song gunu abonanee ebahre anebe Ju, ba bo song gungu bo go ajahbe nyako. Anv, n kp'gungu abonanee ebahne, re bo feere a bo ba gung-r! Bo kpee sa belle, tib nnene belem ejum ji elbunu.

⁹ N kpe soro asi jo bung re, <<Ji n kp'limi n nehme lim go nseenge. Anv, nobem re wahn jen go elfahle ni Esowo ebahre, eji enyok l'k'lohng goji anebekv ebahre ba li ane baka bakaa?

¹⁰ Me, a abonanee ebame, a aneblum ebame, e kp'tob bong ane akpohko, a nkohl. Nong wahr rahken nsehng akoko, e l'bong bo nsol.

¹¹ Feeren ndi egbe ebo ka tvtv, egbe agreb, egbe oliv, a ntahk ebo, m bahke tob feere a nsehng nyi m ma ko ebo abo ka bo, yehke ekpohko ajehng go ekpohko atahl alon ka, nkohl, amahm nfenfe, a akehng oliv.>>

¹² Owo bo kehm faange re, <<E bahke feere ejum ajehng ajehng ka bo, e neh m kpe bahb bo ejum ajehng ajehng. Ana a bungu no, ano wo e bahke limi. Owo n kehm lungu abalimajom, feere lim eji agburu ane, a atubesi ane l'ko nwongo re, bo bahke limi ana bo ma nyam.

¹³ N kpahle ebam ajame kum, kehm bungu re, <<Mbang ny'nehm a nyi, nong Esowo kum nne awohng awohng no ki bum enyam bia yehke go ege etahk a afang enye. Nong nne noo bo kum-e yehke, á sa abo abo!>> Ane ba ji o kpee taame bung re, <<Jol ano," bo fere tehk Jehova. Fvfo bo song limi ana bo nyame no.

¹⁴ Ana jolo jol o, eji ntula Atajejes ma fili ejahbe rehng nnya eltahl, ngare nyi bo yehk-m re me n jol ntubesi abo go ndi nyi Juda, tete rehng eltahl a nnya ewubu a nnya ebal nyi Atajejes kpi nfili nfili edi. Ewubu a nnya ebal nyio, nsol alehke nyi jolo ka ntubesi, jol me, afi abonanee ebame joom li.

¹⁵ Wo atubesi ba tohko jo fili adi, ba n kp'toono bo, bo si ane baa egburu elsol, fere taare bo ebahk asilva atahl abal, budu nsol alehke, a amahm ma bo jo ka atubesi ebo. Akpee ebo fvfo jo nyede na ane elsol. Wo eji n jo fahl Esowo, me ano n limem.

¹⁶ Ji n jo lim, n rodo elname kak r'rahbe go eltum ekahme jia go ellange. Aneblum ebame kpee jolo o jo lim eltum. Jol edi ndi ajehng ajehng e gunem.

¹⁷ Kpe kpee o, anebe Ju a atubesi ane, ane atahl asehma ane awubu jo li nsol go egame ekpukuru, a ane ba lohng go agburu ajahbe nya li senng-r kak.

¹⁸ Efung abehng abehng, nsol alehke nyi a, nyi jo lohng go egame ebam, nlum edahmagbudu anyehng, ejoro erakera nya nno a nno, a ekok gbalee. Go nfung ewubu anyehng anyehng n jo ka ajoobo amahm gbalee. Jol eji elsol nia yakk-m

yakke, nsol alehke nyi bo jol-m jo ka ana ntubesi, n joom bahb. Tibre ane baa, elsol nyede bo sehng.

¹⁹ Buum-m, tib-m nnoobo Esowo ebame, go nsol kpee nyi m ma lim ka ane baa.

6

Bo Soro Asi Jo Sahde re bo k'kpe tuungu Ekahme lang

¹ Eji Sanbalati, Tobaya, a Gesem nnea Arab, a erik anebekv ebahre wuku re me n tuungu ekahme lang mal, jol eyake ajehng ajehng kpeem sa, sehngem re ngare nyio abu nya nya e kala kak go abuga.

² Sanbalati a Gesem kehm tumu etib bia tv-m re: <<Ba, wahr ba wane go mmojahbe awohng, go edi ebal ebal ji Ono.>>

Wo bo bele ebi ntoobo re bo lim-m ebi ejum;

³ Owo n kehm tumu atiatingitib tv bo a nfaange nyia re: <<N kp'limi egburu eltum, n nehm ma ba. Jenji wahng ka eltum bahke rahke, n fere tahm sa, m fere mehl ba kpir-n go?>>

⁴ Bo tumu etib b'nehm tv-m nkpel na eni, fvfo nkpel anyehng anyehng nfaange ny'nehm nyi n jo faange bo.

⁵ Wo eji biingi nkpel elon, Sanbalati tumu ekpeele eje tv-m, a etib b'nehm. Fvfo á fili nwer go ege ebo nyi bo ki bulu.

⁶ bo nyono re,

<<Bobtooro go ajahbe, Gesem ma-m tong re li go etingitingi re wo, a anebe Ju, n kp'toobo re, wahn nok bel elnahne antahng, fvfo ji ji wahngka

ń kp'lange ekahme. Etib bia tob bungu re, á kp'toobo re wo jol ntula abo,

⁷ anv wob tob yehke abanyehnamahr ba bahke tiingi tong ane bada na, go Jeusalem re, <Ntul ebjol go Juda!> Anv kahn re etib bia bahke feere song rehng goji ntul, ba wahr tooben egom egom.>>

⁸ N tumu nfaange nyia tv-e re, <<Ejumjum ana ji a kp'bungu nehme jol, a kp'tob bung na bung jia ana kpa-a bake go esi.>>

⁹ Wo bo kpee jo sebe re bo nehk-r, a ntir re, <<Abo anebe Ju bahke woono bo gbalee go eltum, fvfo eltum nia nehm mal.>>

Wo n kake ero re, <<Anv ka-m atahne go eltum nia.>>

¹⁰ Efung abehng n je go etahk ji Semaya mmona Delaya, mmona Mehetabel, ye ji bo bam-e kak go ege etahk. Á kehm-m tongo re, <<Nong wahr wane go etahk Esowo, woomo o atahng, bam abutahk kpee, tibre ane kp'bake re bo ba wul-a, atv bo bahke bake ba wul-a.>>

¹¹ Wo n kehm bungu re, <<Anv, nnenlum ana me bea? Afi nne ana me song yel go etahk Esowo tahre elkpín enama? Me nehm tiki je!>>

¹² N sebe kahn re, Esowo sang tum-e, yeb nyehn ebi amahr bada aname, tibre Tobaya a Sanbalati me-e yaam-e.

¹³ Bo yaam-e re á ba nehk-m, eji l'jol abiafem n l'toono lim ejum ana jia, toono o bo ka-m ebi mbing eji l'red-m.

¹⁴ Esowo ebame, buumu ji Tobaya a Sanbalati ma lim; fvfo tob buumu ji Noadiya

nnyehnamahra nnenkal, a erik abanyehnamahr bako ba kp'tiri re, bo nehk-m.

Eltum Ekahme Alange Ebmal

¹⁵ Ano wo bo male eltum ekahme nia go eltahl a nfung elon mi nnyahng mi bo kpo lung re Elul. Bo ko nfung atahl abal, a nfung ewubbal lim eltum nia mal.

¹⁶ Eji anebekv ebahre kpee wuku bade ejum jia, ajahbe kpee nya li senng-r kak jo f' fahl, abo fere woono bo, tib bo sebe kahn re eltum nia e limi tib go ekakebo ji Esowo ebahre.

¹⁷ Fvfo, go afung nyao agburu ane ba Juda jo tumu awer gbalee tv Tobaya, wo nfaange jo soro lohng goji Tobaya ba kpiri bo.

¹⁸ Wo ane gbalee go Juda ko nwongo jo toono Tobaya, tib eji Tobaya ko mmona Sekaniya mmona Ara go elbal, wo fvfo mmon ewe Jehohanana koo mmona Mesulam, mmona Berekiya go elbal.

¹⁹ Esehng sehnge, bo soro asi jo tong-m anobonobo nsol nya Tobaya ma lim, fere jo tong-e ji m ma bung. Wo Tobaya jo tumu awer tv re ba nehk-m.

7

¹ Ngare nyi bo ma tuungu ekahme lang mal, m ma fere kak abutahk kpee, fere yehke abab'baabe ati mbu, tob yehke akahme kahme abayimase, fvfo bo ma tob ka anebe Levi ntum ebo.

² N rodo Hanani mmonanee bum ntubesi re á jo fili Jeusalem, a Hananiya, ji ntubesi ekpasiki,

tibre á jolo nne no nne bahk-e ma bum etingitingi, á fere jo fahl Esowo sehng egom ane jehko.

³ N tongo bo re, <<Kana jo lennge eti mbu Jeusalem tete ngare nyi njul ma fub. Eji abab'baabe kpake li go eltum, nong bo ta abu, fere kak nti elsiki. Fvfo yehken ane ba lene Jeusalem, bo jol abab'baabe, bako jol go ebo adi ntum, baka jo baabe kohlo ntahk ebo.>>

Abing Ane Ba Je Eju Ba Ma Feere Kehnge

⁴ Ngare nyia Jeusalem jolo egburu ejahbe, sahb kp'kpange, wo abon amohk ane abik abik ba jolo o, ntahk gbalee bo ka tuungu si.

⁵ Wo Esowo ebame kehm-m melle go egame eltim re me n lung atubesi agburu ane, a atubesi abalimeltum, a nne awohng awohng noko, re bo ba kak abing ebo go nwer, ebangenahb ebangenahb. N ba nyehne abing ane ba gbo mbang kehnge go et'tohngo et'tohngo. Jia ji n nyehne no, ji bo nyono no:

⁶ A wo li ellong ane ba lohng erohko ejahbe ba, ba kehnge eju, bo ji Nebukadneja ntula Babilon tahme abo eju. (bo feere kehnge go Jeusalem a Juda, no nne feere go ege ejahbe,

⁷ bo jene ellong anehng a Jerubabel, Josua, Nehemaya, Ajariya, Raamiya, Nahamani, Modékaya, Bi Isan, Mispereti, Bikvayi, Nehum, a Baana). Ana wo nfange aneblum Isreel jolo no:

⁸ Go ebangenahb ji Parosi, ane atahltahl nkpel elon a ane atahl anehkeni, a ewubu ane abal (2172),

⁹ Ebangenahb ji Sefatiya, jolo ane atahlku atahl era, a ewubu ane abal (372).

¹⁰ Ebangenahb ji Ara, jolo ane atahltahl atahl awubu, a ane atahl abal a ewubu ane abal (652).

¹¹ Ebangenahb ji Pahat-Moab (Jesua abola Joab, eyake ajehng ji) bo jolo ane atahltahl nkpel esehma a elku ane ara(2818).

¹² Ebangenahb ji Elam jolo ane atahltahl nkpel era, a ane atahl abal, ane ewubu ane ani(1,254).

¹³ Ebangenahb ji Jatu, jolo ane atahltahl nkpel ebal ane atahl abal ane alon(845).

¹⁴ Ebangenahb ji Jakayi, jolo ane atahltahl atahlku a ane atahl ara(760).

¹⁵ Ebangenahb ji Binuyi, jolo ane atahltahl atahl awubu, a ane atahl abal ane anehkeni (648).

¹⁶ Ebangenahb ji Bebayi jolo ane atahltahl atahl awubu, a eltahl ane anehkeni (628).

¹⁷ Ebangenahb ji Ajigad jolo ane atahltahl nkpel elon ane atahlku, a eltahl ane abal(2322).

¹⁸ Ebangenahb ji Adonikam, ane atahltahl atahl awubu a ane atahl ara ane asehma(667)

¹⁹ Ebangenahb ji Bikvayi, jolo ane atahltahl nkpel elon, ane atahl ara ane asehma(2067).

²⁰ Ebangenahb ji Adin, jolo ane atahltahl atahl awubu, a ane atahl abal ane elku(655).

²¹ Ebangenahb ji Ata (sehng eji Hejekaya) jolo ane atahl ani ane elku era (98).

²² Ebangenahb ji Hasum, jolo ane atahlku, a eltahl ane anehkeni(328).

²³ Ebangenahb ji Bejayi, jolo ane atahlku a eltahl ane ani(324).

²⁴ Ebangenahb ji Harif, jolo ane atahl alon ane awubu a ane abal (112).

²⁵ Ebangenahb ji Gibion, jolo ane atahl ani, ane elku (95).

²⁶ Aneblum ba Betlehem, a ba Netofa, ane atahl asehmwubu ane anehkeni(188).

²⁷ Anebe Anatoti ane atahl arakera ane anehkeni(128).

²⁸ Anebe Bet-Ajimaveti ane atahl abal ane abal(42).

²⁹ Anebe Kiriati Jearim Kefira, a Beeroti ane atahltahl atahlku a ane atahl abal ane ara(743).

³⁰ Anebe Rama, a ba Geba, ane atahltahl atahl awubu kunu eltahl a nne awohng (621).

³¹ Anebe Mikmasi ane atahl arakera ane abal (122).

³² Anebe Betel, a ane ba Ai, ane atahl arakera ane ara (123).

³³ Anebe Nebo bako, ane atahl abal ane awubu ane abal(52)

³⁴ Anebe Elam bako, ane atahltahl nkpel era, a ane atahl abal, ane ewubu eni(1254).

³⁵ Anebe Harim, ane atahlku ane eltahl (320).

³⁶ Anebe Jeriko, ane atahlku atahl abal ane alon (345)

³⁷ Anebe Lod, Hadid, a ba Ono, ane atahltahl atahlku ane atahl abal, a nne awohng (721).

³⁸ Anebe Senaa, ane atahltahl nkpel esehmwubu ane atahlku ane atahl ani, a eltahl ane alon(3930).

³⁹ Abalimajom ba a , ba kehnge go eju: Eban-genahb ji Jedaya (sehng go ebangenahb ji Jesua), atahltahl nkpel ebal, atahl anehkeni a ane awubu a ane ara (973).

⁴⁰ Ebangenahb ji Emmer, jolo ane atahltahl nkpel ebal ane atahl awubu, a ane atahl abal ane

awubu, a ane abal (1052).

⁴¹ Ebangenahb ji Passu, jolo ane atahltahl nkpel era a ane atahl abal ane asehma (1247).

⁴² Ebangenahb ji Harim, jolo ane atahltahl nkpel ebal a atahl awubu, a elku ane abal (1017)

⁴³ Anebe Levi: Ebangenahb ji Jesua (eyake ji Kadmiyel, eyake ji Hodaviya) jolo ane atahl ara ane awubu ane ani (74).

⁴⁴ Abayimase: Ebangenahb ji Asaf, jolo ane atahl asehma ane anehkeni(148).

⁴⁵ Abab'baabe ati mbu: Go abangenahb nya Salum, Ater, Talmon, Akub, Hatita, a ji Sebayi jolo ane atahl arakera ane elku era (138).

⁴⁶ Alokeltum go etahk Esowo: Go et'tohngo ji Jiha, Hasufa, Tabaoti,

⁴⁷ Keros, Sia, Padon,

⁴⁸ Lebana, Hagaba, Salmayi,

⁴⁹ Hanan, Gidel, Gaha

⁵⁰ Reaya, Rejin, Nekoda,

⁵¹ Gajam, Uja, Paseya,

⁵² Besayi, Menim, Nefusim,

⁵³ Bakbuk, Hakufa, Hahu,

⁵⁴ Bajiluti, Mehida, Hasa,

⁵⁵ Bakos, Sisera, Tema,

⁵⁶ Nejiya, a Hatifa.

⁵⁷ Abangenahb nya alokeltum ba Solomon nya a: Ebangenahb ji Sotayi, Sofereti, Perida,

⁵⁸ Jaala, Dakon, Gidel

⁵⁹ Sefatiya, Hatil, Pokreti-Hajebayim, a Amon.

⁶⁰ Alokeltum go etahk Esowo, a abangenahb ji aloketum ba Solomon, jolo ane atahlku ane atahl ani ane awubu, ane abal.

⁶¹ Ane baa a lohng go ajahbe nyaa nya Tel-mela, Tel-hasa, Kerub, Adon, a Emer, bo kpee maam tib re ebangenahb ebo lohng go Israel.

⁶² Ebangenahb ji Delaya, Tobaya, a Nekoda, ane atahltahl atahl ewubbal ane abal(642).

⁶³ Go ellong ni abalimajom: Ebangenahb ji Hobaya, Hakoji, a Barjilayi (nnenlum no ko mmona Barjilayi go elbal ji nnea Giled, bo fere jo lung-e kpiida mbing nyio.

⁶⁴ Ane baa sebe nwer nyi bo nyono abing ebangenahb ebo, bo nyehnem, bo yehke bo go ellong abalimajom, fere ko bo ana ane ba ki li saang.

⁶⁵ Nfila adi taamem re bo li akahmekahme nsol alehke nyi ga li saang, tete nlimanjom ba, no bahke koko Urim a Tumim seb kahn joare bo abalimajom ba. *

⁶⁶ Ane ba kehng no kpee, jolo, ane atahltahl nkpel atahl alon, a nkpel elon, a ane atahlku era (42,360).

⁶⁷ Nfange nyi alokeltum ba nlum, a ba nkal, ba jolo atahltahl nkpel elku era, a ane atahl arakera, a elku ane abal (7337), go abayimase, ba nlum a ba nkal ane atahl ewubu a atahl abal nnyam alon (245), woomem go atahng nfange nyio.

⁶⁸ Ebvankang atahltahl atahlku, a eltahl elku a mbvankang anyehng(736), abon adahmagbudu atahl ewubu atahl abal, edahmagbudu eblon (245).

* **7:65 7:65** Urim a Tumim: Abon nsol abal ba kpo woomo nlimanjom go ebam, á kpo ko seb ntir atahng Esowo bade ejum; jang jang ana bo kpo k'ko lim nnene nehme kahn

⁶⁹ Ekamel atahltahl, eltahl ekamel elku (435), a adonki atahltahl nkpel elku anyehng, a atahlku anyehng (6720).

⁷⁰ Atubesi ba abangenahb nyandiki tahbe nsol nyi tobo ane go eltum. Nfila adi no jo fili erohko ejahbe, ka abahk agul, atahltahl nkpel ebal atahl awubu (1000), ngbojok atahl abal a ngbojok ewubu, nya bo ko agul lim (50). a akpa-wobo atahltahl atahl alon kunu eltahl ekpawobo ebwubu (530)nya abalimajom kpo kak.

⁷¹ Atubesi bako tob ka ebahk agul atahltahl nkpel atahl abal a nkpel ewubu (20000), a asilva nya jolo ekilo atahltahl nkpel era a atahl alon (1300kg)

⁷² Kpee nya erik ane bako ka no jolo abahk agul atahltahl nkpel atahl abal a nkpel ewubu (20000) Asilva jolo ekilo atahltahl nkpel era (1200kg) a akpawobo atahl ara ekpa ebsehma nya abalimajom.

⁷³ Abalimajom, anebe Levi, abab'baabe ati mbu, abayimase, a abalimeltum go etahk Esowo, a ellong ane bako, a erik anebe Isreel, feere kpee kehng go ebo ajahbe

Ejira Lungu Nwer Atahm

Eji nnyahng esehma ba rehng, wo anebe Isreel ebsong ji go ebo ajahbe,

8

¹ ane kpee kehm ba kono edi ajehng ana nne awohng go elatahkgur songo songo mbuga alahb. Bo tongo Ejira nt'tibi no atahm re á yehke nwer atahm nyi Mosis ba, nyi Jehova ka Isreel elkahn.

² Ano wo go ngbokabang efung bi nnyahng esehma Ejira nlimanjom ko atahm ba a nya go esamahr ane ba ma kono, ellong ane nia jolo aneblum a anebkal, a ane kpee ba nsol nyia bahke ma lennge bo.

³ Á lungu nwer nyio wahre wahre bomo efunfu tete efin yiimi, ana á yiimi go elatahkgur jio ji Eti Mbu Alahb. Á yiimi go esamahr aneblum, anebkal, a ane ba nsol nyia bahke ma lennge bo. Fvfo nne awohng awohng wuungu atung nobnob go Nwer Atahm.

⁴ Ejira ji nt'tibi no atahm kuumu go egudu ji bo limi akpakenti tib go esi elwane nia. Ane ba yiim-e go ejang eboblum, Matitaya, Sema, Anaya, Yuriya, Hilcaya, Maaseya; bo ji yiim-e go ejang ebobkal, Padaya, Miseyel, Malkija, Hasum, Hasbadana, Jekaraya, a Mesulam.

⁵ Ejira lennge nwer nyio. Ane kpee jo nyehn-e nyehn tib á kuumu egudu ji kp'wahre sehngedi ji ane yim no. Eji bo nyehn-e no á ma lennge nwer atahm, ane kpee mehl yiimi.

⁶ Ejira kehm tehke Jehova, Esowo bi kpi nsahm; Owo ane kpee kehm mehle abo ebo wahre go ero, kehm faange re, <<Jol ano! Jol ano!>> Owo bo kehm gongo ndi tehk Jehova, a asamahr ebo go ndi.

⁷ Anebe Levi baa, Jesua, Bani, Serebaya, Jamin, Akub Sabatayi, Hodiya, Maaseya, Kelita, Ajariya, Jojabad, Hanan, a Pelaya, bo ba jo tub ane elle bade atahm nya bo ma wuk, ane kpee yiimi go ebo adi.

⁸ Bo lungu go nwer atahm nyi Esowo, fere jo lennge ka ane ana lohngo no, eji ane bahke ma

kahn ji bo ma lung.

⁹ Nehemaya, ntubesi erohko ejahbe, a Ejira nlimanjom, a nt'tibi no atahm a anebe Levi, bo ji jo lennge ka ane ana atahm lohngo no, kehm bungu tong bo kpee re, <<Kana ling go elkohn efung ana bia, lela li efung bi li saang ka Jehova Esowo ebahne.>> Tib ane kpee jo lingi eji bo jo wuungu atung go alum nya atahm.

¹⁰ Nehemaya kehm bungu re, <<Songen, wahn song lim eyiiki ji nsol alehke nyi m ma yehke nyi kp-n koro, a ayebebebe nsol nya elwoko, fere tumen nyandiki tv ane ba ki kpi. Efung bi lela li saang ka Jehova ejahre. Ntim ki-n gbiingi, tibre eyebatahng ji Jehova kp-n kake ji li atahne enyahne.>>

¹¹ Anebe Levi limi ane kpee jol soom, fere tong bo re, <<Kpooren, tib efung bia, efung bi li saang bi. Ntim ki-n gbiingi.>>

¹² Owo ane kpee tahme no song li nsol alehke nyi eyiiki jia, fere w'wo, fere tum nsol alehke tv atemtem go elkak nia go egburu eyebatahng, tibre anv, bobkahn alum nya bo ma lennge ka bo.

¹³ Etoono efung go nnyahng mio, atubesi go abangenahb kpee, a abalimajom, a anebe Levi, bo ba kono ji senngE Ejira nt'tibi atahm kak re bo wuungu atung go alum nya atahm.

¹⁴ Bo nyehne re bo nyono go atahm, nsol nyi Jehova ma ka elkahn sehng go abo nya Mosis, re anebe Isreel jo lene go abonkpatahk, go ngare elkak ni nnyahng esehma,

¹⁵ fvfo bo bahke jo tiingi ane alum nyaa kpee go bo afam ejahbe, a Jeusalem re: <<Lohngen, wahn

song ejahbe ewong, wahn song banne ab'bo oliv, a nya ma mahng adi adi, a eti ji bo kpo lung re mitehl, amang, a abahm bahm, a amang mbohng wahn lim abonkpatahk ana bo nyono no.

¹⁶ Ano wo ane lohngo song ko ab'bo nti kehm ba kehme ebsehke abon nkpatahk kunu go ebo ero elbulu ntahk, bo si ano go ebo alaaga, a nlaaga nyi etahk Esowo, a elatahkgur jio ji Eti Mbu Alahb, a jehko ji eti mbu Efriim.

¹⁷ Ane kpee ba ma kehng eju, si nkpatahk ebo fere woomo. Bomo afung nya Josua mmona Nun tete rehng efung bio, anebe Israel ka l'lim elkohn eyiiki ana jia. Fvfo eyebatahng ebo gbale sehng.

¹⁸ Efung efung, bomo go ngbokambang efung tete rehng go es'kohro efung, Ejira jo lungu go nwer atahm nyi Esowo. Bo limi elkak nia go nfung esehma. Go efung bi biingi nfung enehkeni, ana eljini li no, bo ba kono edi ajehng.

9

Anebe Isreel fvrv Abiafem Ebo

¹ Eji ma biingi eltahl a nfung eni go nnyahng mio, anebe Israel kehm kono edi ajehng, bade elbo njal, fere kak nsol elkv anoongo ebo agub-jing, fere kpu atong kak elbo go ebo asi.

² Ane ba lohng go et'tohngo ji Israel yabe elbo go ellong ni ajenne. Bo yiimi go ebo adi, fvrv abiafem ebo, a ab'bi nya babnde ebo.

³ Ejum awa arakera, bo yiimi jo lung atahm nya Jehova Esowo ebo. Bo kpe ko awa arakera nyako jo fvrv abiafem ebo, fere jo kak Jehova Esowo ebo.

⁴ Anebe Levi ba yiimi nwahre wahre edi ba a: Jesua, Bani, Kadmiyel, Sabaniya, Buni, Serebaya, Bani, a Kenani. Bo ba jo rabe wahre wahre jo tong Jehova, Esowo ebo.

⁵ Fvfo anebe Levi, Jesua, Kadmiyel, Bani, Hasabniya, Serebiya, Hodiya, Sebaniya, a Petahiya kehm bungu re, <<Mehlen yiimi , wahn tehk Jehova, Esowo ebahne. Ye ji ki kpi mbomannahb, jol ekahlsi á kpimm.>>

<<Elfuulu jol ka Mbing enya nyi kpi ellub, nong jol wahre wahre sehng elfuulu a eltehke.

⁶ Wo ntahng ntahng wo li Jehova. Wo wo limi elbung a nkpake elbung ni sahb w'wahre, a alonlo ebo kpee, ndi a nsol kpee nyi li no, agburu aya a nsol kpee nyi wob go atahng. Wo wo ka ejum ajehng ajehng elkpin. Ejum ajehng ajehng ji kpi elkpin go ajahbetul kpo kaka.

⁷ “Wo wo li Jehova Esowo bi yehke Ebram, fere rod-e go Ur ji Kaldia tahm a ne, fere ka-e mbing re Ebrahim.

⁸ A nyehne eltim ene re yebtaame tv-a, fvfo a limi egbanngalung a ne, re a bahke kake et'tohngo eje ndi nyio nyi anebe Kenan, anebe Hiti, Amor, Pereji, Jebusi, a anebe Girigasi. Woblim ji a nyame no, tib a li etingi nne.

⁹ A ny'nyehn erem bi babnso nyehne no go Ijib. A t'tob wuk eling ebo go aya nkpafo.

¹⁰ A tumu akpokosi a nliingi bada Fero, atubesi ane ebe kpee, a ane ebe kpee. A jo k'kahn ana anebe Ijib jo sab-r elfili. Mbing enya bele elgahm ni á limi ka elna, ni li tete rehng lela.

¹¹ A yabe aya go ebo esamahr , ano wo bo jene sehng go ewumwum ndi. A yake ane ba jo kam

bo kak go atahng aya, ano wo bo faame song ter ana ekahmetal go agburu alahb.

¹² A koo ekparesemsem jo tv bo go ngara njul, atv ekparesemsem ji jolo agun agun ji jo ka bo ellennge go mbang nyi li re bo sehng.

¹³ A badde ba go ewong Sinayi, alum enya lohngo ero ba bung a bo. A ka bo nle, a atahm nya li nseenga nseenge, fere ka bo ajehke, a nkahn nyi kp'nobo.

¹⁴ A limi bo kahn atahm kpee bade Efung Erekekv bi li saang. A ka bo nkahn, ajehke, a atahm sehng go abo nya Mosis nlokeltum ewa.

¹⁵ Go eboa njal, a ka bo mmana nyi lohng go elbung, ana alahb koro bo, a yehke alahb go ekpartal ka bo. A tongo bo re bo song, song ko edi ndi ji a nyame ton ebo go ero re a bahke kake bo.

¹⁶ Wo bo, babnsoo ejahre bele agabbe, fere tahne asi, wo nkahn enya bo bumem.

¹⁷ Bo tene atung awuungu, jol bo kpeem buumu akpokosi nya a limi go ebo ellong. Bo jo tahne na esi, go ebo etahnsi bo yehke ntubesi no bahke feere a bo go eju bi Ijib. Wo Esowo, wo wo li Esowo bi kpo tahm ka nne, a kpi ndon, a kp'nobo, a kpehme rak atahng sohk sohk, elkoro ena kpehme kane. A senngem bo njahm,

¹⁸ jol eji bo mongo elokelom ka elbo go elfoongo mmon a nfong, fere bung re, <A wo li esowo ebahne, ye ji yehk-n go Ijib lohng anahne,> afi eji bo bungu abi nsol daange mbing enya.

¹⁹ Wo go ega egburu ndon, a tahmem bo sa elka emahng. Go efung ego ekparesemsem tikem rahke eltibi bo mbang, jol ego ekparesemsem

agun go atv tikem rahke ellennge akake go mbang nyi bo bahke sehng.

²⁰ A ka bo nnoobo etohko eja re jo tub bo elle, a tikem kane bo mmana akake go eboa nnyo, a ka bo alahb eji koro ebo.

²¹ Go nnya atahl abal á le bo nobnob go elka emahng. Bo jolem go elehng ejum ajehng ajehng, nsol ebjing ebo tikem kpo alahb, jol akpade ebo ruurem.

²² <<A ka bo ajahbe a ane kpee, a ka bo tete rehng go akpohko ejahbe nya li go atahng atahng. Bo song taare Sihon ye ji jolo ntula anebe Hesbon. fere song taare Og ji jolo ntula anebe Basan. .

²³ A limi at'tohngo ebo rur ana alonlo nya li go elbung, a fere ko bo ba rehng go ndi nyi a nyame tong babnde ebo re bo ba yel ko.

²⁴ Abon ebo ba yel, song ko ndi nyio, a rede anebe Kena go ebo esamahr, bo ji lene o, a faake anebe Kena kak bo go abo, a atul ebo, a ane kpee ba lene o, re bo fili bo ana kpi bo kor.

²⁵ Bo ko ajahbe nya si akahme sennge elbo kak, a nvemma ndi ebo. Bo taare ntahk ebo, nya ma rur a elkohn anoobo nsol anyehng anyehng nya wob atahng, a abing alahb nya bo ma kpa wuku wuku, ebgbe agreb, arahn oliv, a nti akab gbalee. Bo li w'wohngo, fere nob go agubjing, jo geere kak egburu nnoobo enya.

²⁶ Wo bo wa kpunem, bo tahne esi a na, bo rodo atahm enya bum go nkpe. Bo wulu abanyehnamahr eba, ba jo rehke bo re bo sennge feere go ega. Bo jo kono mbing enya su.

²⁷ Ano wo wahng ka a faake bo kak anebekv ebo go abo, bo jo nohk bo. Wo ngare nyi bo jo

nohk bo, bo lingi tob-a. Go ejahbetul a w'wuku bo, go ega egburu ndon, a ka bo ane ba ba tahre bo yehke go abo nya anebekv ebo.

²⁸ Wo ngare anyehng anyehng nyi bo l'bel erekekv, bo kpe kehme ab'bi lim go ega ejang. Wo a yake bo kak anebekv go abo, eji bo l'jo fili bo. Eji bo kpe ling tob-a, a w'wuk go ejahbetul, ana ndon enya li no, a tahre bo nkpela nkpele.

²⁹ A rehke bo re, bo feere ba bum atahm enya, wo bo fere jo lim agabbe, fere ten atahm enya go eltoono. Boblim abiafem bada ajehke enya, nyao nya a tongo re nne l'toono á bahke bele elkpin. Go ebo etahnsi, bo ma-a sennge njahm, kpi esi tahne, fere ten atung awuungu.

³⁰ A bele elkpuumu a bo aya gbalee. Go ega Etohko a sehng go nnyo mi abanyehnamahr eba rehke bo. Tvtv o bo joom tiki wuk. Ano wo a yake bo ka anebekv ba li kohlo bo.

³¹ Wo go ega egburu ndon, a seabem re wo ranng bo, afi ten bo. Tibre wo li Esowo bi kpi nnoobo eljini, a ndon.

³² <<Wo anv, Esowo ebahre, wo wo li egburu Esowo, a kpi nsahm, a li Esowo bi kp'menng. wo kpo bum enyam eba bi elkoro, ka taame adi nya ma-r riidi a jol ndaange ndaange go ega esamahr. Ariidi nsol ma-r lim, eblim atul ebahre, atubesi, abalimajom, abanyehnamahr, a babnsoo ewahre, a ane eba kpee, bomo go ngare nyi atul ba Asiria, tete ba rehng anv.

³³ Go ajehng ajehng ji ma-r lim, a tiki li etingi Esowo. Ji a kp'limi li nseenge, wo wahr kpo lim ab'bi.

³⁴ Atul ebahre, atubesi ebahre, abalimajom ebahre, a babnsoo ewahre taamem toono atahm enya, jol ajehke nya a rehke bo, bo taamem jo lim.

³⁵ Jol eji bo jolo jol go ebo nji etul, jo li anoobo nsol nya lohng go nkpaanga nvemma ndi, nyi a ka bo, bo wa joom loko, jol bo yakem abi abang ebo.

³⁶ <<Wo nyehn, wahr aju nya lela, aju go ndi nyi a ka babnsoo ewahre re bo li akab nti a anoobo nsol nya lohng o.

³⁷ Tib go esi abiafem enyahre, nsol kpee nyi e kpo fv, li ka atul ba a ma yehke re bo jo fil-r. Bo ba kp'fili agubjing enyahre a atohkondi enyahre ana kpi bo kor. E kp'nyehne erem gbalee.

Ane Taame ko nwongo Re Bo Bahke Bumu Atahm Esowo

³⁸ Tib esi nsol nyia kpee, e kp'koko nwongo, e bahke yeele na kak nwer, fvfo atubesi ebahre, anebe Levi ebahre, a abalimajom ebahre, bo bahke bannge abo ebo go nwer nyio.

10

¹ Ane ba bannge abo ebo ba a: Ntubesi Nehe-maya mmon no Hakaliya, Jedekaya

² Seraya, Ajariya, Jeremaya,

³ Pasu, Amariya, Malkija,

⁴ Hatusi, Sabaniya, Maluku,

⁵ Harim, Meremoti, Obadiya,

⁶ Daniyel, Gineton, Baruk,

⁷ Mesulam, Abija, Mijamin,

⁸ Maajiya, Bilgayi, a Semaya. Bo ba jolo abali-majom.

⁹ Anebe Levi: Jesua mmona Ajaniya, Binuyi ji lohng go ebangenhb ji Hanadad,a Kadmiyel,

¹⁰ a anebe Levi bako: Sebaniya, Hodiya, Kelita, Pelaya, Hanan,

¹¹ Mika, Rehob, Hasabiya,

¹² Jakur, Serebiya, Sebaniya,

¹³ Hodiya, Bani, a Beninu.

¹⁴ Ane ba jolo atubesi ane: Parosi, Pahati Moab, Elam, Jatu, Bani,

¹⁵ Buni, Ajigad, Bebayi,

¹⁶ Adonija, Bikvayi, Adin,

¹⁷ Ater, Hejekaya, Ajur,

¹⁸ Hodiya, Hasum, Bejayi,

¹⁹ Harif, Anatoti, Nebayi,

²⁰ Makpiasi, Mesulam, Hejir,

²¹ Mesejabel, Jadok, Jadua,

²² Palatiya, Hanan, Anaya,

²³ Hosea, Hananiya, Hasub,

²⁴ Halohesi, Pilha, Sobek,

²⁵ Rehum, Hasabna, Maaseya,

²⁶ Ahiya, Hanan, Anan,

²⁷ Maluk, Harim, a Baana,

²⁸ “Erik ane jehko, abalimajom, anebe Levi, abab'baabe ati mbu, abayimase, abalokeltum ba etahk Esowo, a ane kpee ba yabe elbo go ellong ane baka baka ba lene edi jio re, tib esi atahm nya Esowo, bo a akal ebo, a abon abon ebo, bo ji bahke ma wuk, fere kahn ji bo ma wuk.

²⁹ Ane baa kpee semme elbo a anebe Isreel abonanyehn bo, ba jolo atubesi, ko nwongo re nkuk anahre, E bahke bumu atahm Esowo nya Esowo ka sehng goji Mosis nlokeltum Esowo, fvfo

e bahke kunu ekpu bum atahm Esowo kpee, a ajehke nya Jehova ntul ewahre.

³⁰ “Wahr ebnyam re e nehm rod abon ebahre ba nkal ka re bo song bal ane baka baka, ba li senng-r kak, afi ko abon ebo ba nkal ka abon ebahre ba nlum.

³¹ Ane baka baka l'ko nsol elgungu, afi akabenti ba re bo ba gung-r efung Erekekv, afi efung abehng abehng bi li saang, e nehm gunu go ebo abo efung Erekekv, afi efung abehng abehng bi li saang. Nnya esehma l'biingi mbahmandi nehm jol, fvfo e bahke yaka nne awohng awohng no kpi-r mbong.

³² <<Wahr ebtaame re e bahke jo ka ebahk asilva ajehng a l'baange edi ebra. go eltum etahk Esowo ebahre:

³³ eji bo bahke jo ko kpur abred nya kun ekpukuru; tib go esi njom akabenti nya bo kpo lim ngare kpe kpe, a ajom nya bo kpo jahmfi, tib go ajom nya Afung Erekekv, nkak nyi Ebareka Nfenfe, a ajoobo nkak nyako nya bo ma yehke kpo lim, tib go ajom nya li saang, tib go ajom nya abiaferm nya bo kpo lim anebe Isreel bel eltahmeka, a nya ntum kpee nyi etahk ji Esowo ebahre.

³⁴ Wahr- abalimajom, anebe Levi, a ane kpee, wahr ebtub elfaange re wahr kahn, ngare nyi ebangenahb ajehng ajehng bahke jo ko ba go etahk Esowo. Nkun nyi bo bahke jo ko jahm agun go egudu njom ji Jehova Esowo ebahre go ekahmekahme ngare go elya ana bo nyono go atahm.

³⁵ Wahr ebtaame re, elya anehng anehng e

bahke jo ko agbokombang akabenti ba go etahk ji Jehova, a nya eti ajehng ajehng ji kpi akab.

³⁶ <<Ana bo nyono go nwer atahm, e bahke koko agbokombang abon ebahre ba nlum, a abon efong, adahmagbudu, a ejoro ebahre ba go etahk Esowo ebahre, ba ka abalimanjom ba kpo lim eltum o.

³⁷ Esehng sehng, e bahke koko nsol nyi e ma kpa ba kak go abuungu nya etahk Esowo ebahre, ba ka abalimanjom, agbokombang nsol nyi bo ma gok, ana ayare nya akohl, akab nti nya nti enyahre kpee, amahm nfenfe, a akehng ma oliv. Wahr bahke koko, ejum ajehng go nsol ewubu enyahre, nya nkpakandi enyahre ba ka anebe Levi, tib bo ba kpo ko ejum ajehng go nsol ewubu enyahre, go ajahbe kpee nya e jo lim eltum.

³⁸ Nlimanjom no lohng go et'tohngo ji Eron bahke jolo go ellong ni anebe Levi eji bo kp'koko ejum ajehng go nsol ewubu. Anebe Levi bahke koko ejum ajehng go nsol ewubu, ba go etahk Esowo ebahre ba go ebuungu ji nsol akuuru.

³⁹ Anebe Israel, anebe Levi wob atahng, bo bahke koko ntahbe nkohl ebo, amahm nfenfe, a akehng oliv, ba go abuungu, edi jio ji akahmekahme nsol nya etahk Esowo kpo jol, jol ka abalimanjom ba li go eltum, a abab'baabe ati mbu, a abayimase.

<< E nehm ma ten etahk Esowo ebahre.>>

11

Aneb nfenfe ba lene go Jeusalem

¹ Atubesi kpee lene go Jeusalem, fvfo owo erik ane bako kehm tubu elfaange re bo yehke nne

awohng awohng go ellong ane awubu anehng anehng, bo ba lene go Jeusalem, ejahbe ji li saang, eji erik ane asehmwubu bako bahke sake go ebo ajahbe.

² Ane t'tehk ane kpee ba yehke elbo antahng re bo bahke lene go Jeusalem.

³ Atubesi arohko ba a, ba ba lene go Jeusalem. Egom anebe Isreel bako, abalimajom, anebe Levi, alokeltum go etahk Esowo, abangenahb nya alokeltum ba Solomon, bo kpee soro asi jo lene go ebo ajoobo ajahbe.

⁴ ane bandiki ba lohng go et'tohngo ji Juda a ji Benjamin lene go Jeusalem: Bo ji lohng go et'tohngo ji Juda:

Ataya mmona Ujiya, mmona Jekaraya, mmona Amariya, mmona Safatiya, mmona Mahalalel, ye ji lohng go et'tohngo ji Pereji;

⁵ a Maaseya mmona Baruk, mmona Kol-Hoje, mmona Hajayiya mmona Adayiya, mmona Joyarib, mmona Jekariya, ye ji lohng go ebangenahb ji Sela.

⁶ Ebangenahb ji Pereji ji lene go Jeusalem jolo ane atahltahl, ane atahl ara ane anehkeni, bo jolo atahntahn ane ba bele ellub.

⁷ Bo ji lohng go et'tonhgo ji Benjamin: Salu mmona Mesulam, mmona Joyed, mmona Pedaya, mmona Kolaya, mmona Maaseya, mmona Ediyel, mmona Jesaya,

⁸ a ane ba jo toon-e, Gabayi a Salayi- ane atahltahl nkpel ebal ane atahl arakera a ane anehkeni.

⁹ Joel mmona Jikiri wo jolo ntubesi abo, Juda mmona Hasenua wo jolo ntubesi go elsi nfenfe go ejahbe jio.

¹⁰ Go ellong ni abalimajom:

Jedaya; mmona Joiarib; Jakin;

¹¹ Serayiya mmona Hilkiya, mmona Mesulam, mmona Jadok, mmona Merayoti, mmona Ahitub ji jo kpur etahk Esowo,

¹² a ane ba bo jo lim eltum ano, bo jo limi eltum etahk Esowo, bo jolo, ane atahltahl nkpel ebal a eltahk ane abal. Adayiya mmona Jeroham, mmona Pelaliya, mmona Amji, mmona Jekariya, mmona Pasihur, mmona Malkija,

¹³ a ane ba bo jo lim eltum ano, bo ji jolo atubesi ane go ebangenahb, bo jolo ane atahl ewubbal ane abal; Amasayi mmona Ajarel, mmona Ajayi, mmona Mesilemoti, mmona Emmer,

¹⁴ a ane ba bo jo lim eltum ano, bo jolo atah-ntahn ane, ane atahl arakera, a ane anehkeni. Ntubesi ebo, bo jo lung-e re, Jabdiyel mmona Hagedolim.

¹⁵ Go ellong anebe Levi:

Semayiya mmona Hasub, mmona Ajirikam, mmona Hasabiya, mmona Buni,

¹⁶ Sabedayi a Jojabad, ane abal baa ba jolo atubesi anebe Levi, ba jo lim eltum alatahk sennge etahk Esowo kak;

¹⁷ Mataniya, mmona Mika, mmona Jabdi, mmona Asaf, á jo tv ane go saam akake, a ero akake; Bakbukiya ji jolo ekpeelee go ebo ellong; a Abda mmona Samua, mmona Galal, mmona Jedutun.

¹⁸ Anebe Levi ba jolo go nfam ejahbe ji jolo saang jolo ane atahltahl, a ane atahl ani, a ane ani.

¹⁹ Abab'baabe ati mbu:

Akub, Talmon, a ane ba bo kpo lim eltum ano, bo ji kpo baabe ati mbu, ane atahl anehkeni, ane awubu ane abal, bo ba jo lim eltum eti mbu abaabe.

²⁰ Erik anebe Isreel bako, abalimajom, a anebe Levi, bo jolo go ajahbe nya Juda kpee, no nne lene go adi elehkelkv ebo.

²¹ Alokeltum ba jo lim eltum go etahk Esowo jolo go ejahbe ewong ji Ofel, fvfo Jiha a Gispa ba jolo atubesi ebo.

²² Ntubesi no ga gbal no jo kpur anebe Levi go Jeusalem bo jo lung-e re Uji mmona Bani, mmona Hasabiya, mmona Mataniya, mmona Maeka, á lohng go et'tohngo ji Asaf, ebangenahb eje jo limi eltum ase ayimi go etahk Esowo.

²³ Abayimase woomo go elwo ni ntul, ye wo jo tong bo ji bo bahke limi efung abehng abehng.

²⁴ Patahiya mmona Mesejabel, ye ji lohng go at'tohngo nya Jera mmona Juda, ye wo jo loko ntul eltum go nsol nyi jolo ka ane kpee.

²⁵ Bade abon ajahbe a ebgbe ebo, egom anebe Juda bandiki lene go Kiriati-Aba, a abon ajahbe ba li senngge bo kak, bako go Dibon, a abon ajahbe ba li senngge bo kak, bako go Jekabjel, a abon ajahbe ba li senngge kak,

²⁶ go Jesua, go Molada, go Beti Peleti,

²⁷ go Hajar-sual, Beeseba, a abon ajahbe ba li senngge kak,

²⁸ go Jiklak, go Mekona, a abon ajahbe ebe.

²⁹ go En-Rimon, go Jora, Jamut,

³⁰ Janua, a Adulam, a ajahbe nya li sennge bo kak. Bo t'tob jol go Lakhisi, a adi nya sennge bo kak, a Ajeka, a ajahbe nya li sennge kak. Ano wo anebe Juda lene no bomo go Beeseba tete song rehng go edamme ji Hinom.

³¹ Ane ba lohng go et'tohngo ji Benjamin lene go Geba, Mikmasi, Aija, a Betel, a abon ajahbe ba li sennge bo kak,

³² go Anatoti, Nob, Ananiya,

³³ go Hajo, Rama, Gitayim,

³⁴ go Hadid, Jeboyim, Nebalati,

³⁵ go Lod a Ono, a go edamme jio ji aneba agb'gbe.

³⁶ Egom anebe Levi ba lene go Juda, song lene go ellong ni et'tohngo ji Benjamin.

12

Abing Nya Abalimajom a Anebe Levi ba Kehnge Eju

¹ A wo li abalimajom, a anebe Levi ba feere kehnge a Jerubabel mmona Seltiyel a Jesua: Ser-aya, Jeremaya, Ejira

² Amariya, Maluk, Hatusi,

³ Sekanaya,, Rehum, Meremoti,

⁴ Edo, Gineton, Abija

⁵ Mijamin, Moadaya, Bilga,

⁶ Semaya, Joarib, a Jedaya,

⁷ Salu, Amok, Hilkaya, Jedaya.

Bo ba jolo atubesi abalimajom, a ane ba bo jo lim eltum a bo ngare nyi Jesua jolo nlimanjom.

⁸ Anebe Levi ba kehng a bo ba a, Jesua, Binuyi, Kadmiyel, Serebaya, Juda, fvfo a Matanaya, ye a ane ba bo jo lim eltum ano, bo jolo ka ase ayimi nya saam akake.

⁹ Bakbukiya abola Uni, a ane ba jo lim eltum a bo, yiimi songo songo go bo a mbuksong go etahk ero.

¹⁰ Josua ji jolo wo jolo nde no Joyakim, Joyakim jol nde no Eliasib, Eliasib jol nde no Joiada,

¹¹ Joiada jol nde no Jonatan, Jonatan jol nde no Jadua.

¹² Ngare nyi Joyakim jolo nlimanjom, ane ba a, ba jolo atubesi abalimajom go ebangenahb ajehng ajehng: Meraya jol ntubesi go ebangenahb ji Seraya, Hananiya jol ntubesi go ebangenahb ji Jeremaya;

¹³ Mesulam jol ntubesi go ebangenahb ji Ejira; Jehohanan jol ntubesi go ebangenahb ji Amaraya.

¹⁴ Jonatan jol ntubesi go ebangenahb ji Maluk, Josef jolo ntubesi go ebangebahb ji Sekanaya;

¹⁵ Adina jol ntubesi go ebangenahb ji Harim, Helkayi jol ntubesi go ebangenahb ji Meremoti;

¹⁶ Jekaraya jol ntubesi go ebangenahb ji Edo; Mesulam jol ntubesi go ebangenahb ji Gineton;

¹⁷ Jikiri jolo ntubesi go ebangenahb ji Abija; Piltayi wo jol ntubesi go ebangenahb ji Miniamin a Moadaya;

¹⁸ Samua jol ntubesi go ebangenahb ji Bilga, Jehonatan jol ntubesi go ebangenahb ji Semaya;

¹⁹ Matenayi jolo ntubesi go ebangenahb ji Joryarib, Uji jol ntubesi go ebangenahb ji Jedaya;

²⁰ Kalayi jol ntubesi go ebangenahb ji Salu, Eber jolo ntubesi go ebangenahb ji Amok;

²¹ Hasabaya jol ntubesi go ebangenahb ji Hilcaya, Netanel jol ntubesi go ebangenahb ji Jedaya.

²² Eji Darius ntula Pesia jo fili edi, bo ny'nyon abing atubesi abangenahb nyao nya anebe Levi, a abalimajom, ngare nyi atubesi abalimajom baa jolo no, Eliyasib, Joyada, Johanan, a Jadua.

²³ Atubesi go ebangenahb ji anebe Levi tete rehng go ngare nyi Johanan mmon no Eliyasib, bo yeele kak go nwer nyi bo jo nyon akahme kahme nsol kak.

²⁴ Atubesi ba anebe Levi ba a, Hasabaya, Serebaya, Jesua mmon no Kadmiel, a ane ba bo jo lim eltum ano, bo yiimi songo songo go mbuksong abo jo tehk Esowo, fere jo kake saam, jo faange atemtem, ana Devid nlokeltum Esowo tibi bo.

²⁵ Matanaya, Bakbukaya, Obadaya, Mesulam, Talman, a Akub, bo ba jolo abab'baabe ati mbu, bo jo baabe edi ji bo kuuru nsol go eti mbu.

²⁶ Bo kpee jo limi eltum ngare nyio nyi Joyakim mmona Jesua, ye ji Josadak jel-e no, ngare ny'nehm nyi Nehemaya jolo ntubesi go erohko ejahbe ajehng, Ejira tob jol nlimanjom, fere jol nt'tibi no atahm.

Nehemaya Yake ekahme ka Esowo

²⁷ Ngare nyi bo ba elyake ekahme ji Jeusalem kak Esowo go ebo, bo sebe anebe Levi yehke go nkphoko anyehng anyehng nyi bo lene no, ba a bo go Jeusalem re bo ba kak ebo go ase ayimi, a saam akake, bo bahke koko nsol nyi bo kpo lung re asimbal, a ntalehk, go ebuk.

²⁸ Bo ko abayimase go abon ajahbe ba li sennge Jeusalem, go abona ajahbe ba anebe Netofati.

²⁹ go Bet-Gilgal, ejang bio bi Geba a Ajimaveti, abayimase ebsi abon ajahbe ka elbo sennge Jeusalem kak.

³⁰ Eji abalimajom, a anebe Levi gbo mbang bum elbo saang, tob bum ane bako saang, a ati mbu, a akahme.

³¹ N limi atubesi ba Juda bo wahr go ero ekahme. N toobo nlong abayimase na abal re bo yim kak saam. Ellong nehko jo jene asongo go ero ekahme ejang eboblum, asongo eti mbu abahng enyam.

³² Hosaya, a ejang atubesi bako (a l'baange atubesi go ejang ebbal) jo toono abayimase.

³³ Ajariya, Ejira, Mesulam,

³⁴ Juda, Benjamin, Semaya, Jeremaya woomo ellong nio,

³⁵ Abalimajom ba fili atang elworu tob jolo o, Jekaraya ji mmona Jonatan, mmona Semaya, mmona Mataniya, mmona Makaya, Jakur mmona Asaf,

³⁶ a ane ba jo lim eltum ano, Semaya, Ajarel, Milalai, Gilalai Maayi, Netanel, Juda, a Hanani. Bo jolo a nsol elkubu ana Devid nlokeltum Esowo tibi bo. Ejira ji jolo nt'tibi no atahm wo gbo ane mbang.

³⁷ Ano wo bo soro asi go eti mbu ji Mb'behl alahb asongo go ejahbe ji Devid, jo wahr asongo go ekahme. bo sehng etahk ji Devid tete song rehng go eti mbu ji alahb ji li feere ero nham.

³⁸ Etoono ellong abayimase nehko jolo songo songo wane a bo. N jo toono bo go ero ekahme, a

ellong ane ji jolo a name, e jene sehng nkahmbungubungu etahk nyi egbakok abred song rehng go nkpange kpange ekahme,

³⁹ sehng rehng go eti mbu Efriim, eti mbu Jesana, eti mbu nsahre, nwahre wahre edi ji Hananel, nwahre wahre edi ji atahl alon, song rehng go eti mbu ejoro. Go eti mbu ji abab'baabe ji bo song yiimi.

⁴⁰ Ellong abayimase abal abal ba jo kak saam, song yel edi ji bo kpo ji go etahk Esowo. Ano wo me, a ellong atubesi e tob song yel.

⁴¹ fvfo a abalimajom, Eliyakim, Maaseya, Mini-amin, Mayikaya, Elioenayi, Jekaraya, a Hananiya a atang elworo ebo,

⁴² fvfo a Maaseya, Semaya, Elieja, Uji, Jehohanan, Malkija, Elam, a Ejer. Jejirahiya wo jo tv abayimase.

⁴³ Wo efung bio bo bele eyebatahng lim agburu ajom gbalee, tibre Esowo ka bo egburu eyebatahng. Anebkak, a abonse abonse tob bele eyebatahng. Ane ba jolo fee jo w'wuk ewahl elgeere go Jeusalem.

⁴⁴ Efung bio, bo yehke ane ba jo kpur abuungu, ajom nya agbokombang akab nti, a eltahme ni ejum ajehng go nsol ewubu. Jolo re bo ko nsol nyio kpee go ebo ebgbe ba kak go ebuungu ana ntahm bungu no, jol ka abalimajom, a anebe Levi, wo Juda bele eyebatahng sehng a abalimajom a anebe Levi ba jo lim eltum.

⁴⁵ Bo limi eltum Esowo ebo nobnob, a eltum ni elbumu elbo saang, ana wo abayimase, a abab'baabe ati mbu tob lim ana Devid, a mmon ewe Solomon ka bo elkahn.

⁴⁶ Mahne mahne, go afung nya Devid a Asaf, ane j'jol ba jo tv ane go ase ayimi, go ase nya Esowo atehke a saam akake.

⁴⁷ Wo fvfo ngare nyi Jerubabel a Nehemaya jolo abafiladi, anebe Isreel kpee jo ko nsol go efung abehng abehng ba ka abayimase, abab'baabe ati mbu, a anebe Levi. Anebe Levi jo yehke go nsol nyi bo ka bo, tob ka abalimajom, bo ji lohng go et'tohngo ji Eron.

13

Nsol nyi Nehemaya gohro yaange

¹ Efung bio, ana bo jo lung nwer nyi Mosis wahre wahre tong ane, bo kehm ba rehng edi nwer ji bungu re, bo k'taame nnea Amon, afi nnea Moab yel semme go ellong anebe Esowo.

² Jia jolo tib anebe Amon a Moab kaam anebe Israel nsol alehke a alahb, eji Isreel jo lohng go Ijib. Ji bo limi no, bo yaame na Balam go akpohko re Balam ba su Isreel, (wo Esowo ebahre fere senng nkuk nyio, fere ka bo fuulu.)

³ Eji ane ma wuk ntahm nyia, bo kehm yehke ajahmjahm go ellong anebe Isreel.

⁴ Re jia kehm jolo, Eliasib nlimanjom bo me- e yehke re a jo baabe akp'kpa nsol akuuru go etahk Esowo ebahre. Á jolo nne no jolo badbad aTobaya,

⁵ wo Eliasib ebrod egburu ekp'kpa ka Tobaya, ekp'kpa ji wuku wuku bo jo kak nkohl nyi bo jo ko lim ajom, insens, ajoobo nsol eltum etahk Esowo, fvfo a eltahme ejum ajehng go nsol ewubu nyi nkohl, anyo amahm, a akehng oliv, ma li ka anebe

Levi, abayimase, a abab'baabe ati mbu, a ntahbe nyi li ka abalimajom.

⁶ Wo eji nsol nyia jo lim, n jolem a Jeusalem, tib go eltahl a nnya ewubu a nnya ebal nyi ntula Ataseses ji ntul no Bebilon, me n feere song rehng goji ntul. Mongare ntiil m bahbe re á ka-m eyake,

⁷ re me n feere ba rehng go Jeusalem. M ba wuku bade eb'bi ji Eliasib ma lim, eji á ma yake ekp'kpa go atahng etahk Esowo ka Tobaya.

⁸ Eltim rak-m sehng eji n nyehne ano, n kehm yehke nsol Tobaya kpee ekp'kpa wohng go elatahk.

⁹ N ka bo nsahm re bo song lim akimi jol saang, n kehm feera nsol eltum etahk Esowo kak, a ayare nkohl a insens.

¹⁰ N kehm sebe kahn re ejum ji jolo re bo ka anebe Levi, bo ka ka bo, wo anebe Levi kpee, a abayimase ba jol jo lim eltum go etahk Esowo, bobfeere kpi ntum ebo lim go ebo ebgbe.

¹¹ N kehm nyame atubesi ane, kehm bahbe bo re, <<Jenji wahnge rí ma ten etahk Esowo? Owo n kehm lungu bo bum edi ajehng, fere feere a bo bum go adi ntum ebo.

¹² Anebe Juda kpee kehm koko nsol eltahme ni ejum ajehng go nsol ewubu nyi nkohl, anyo amahm, a akehng oliv ba kak go akp'kpa nsol akuuru nyi etahk Esowo.

¹³ N kake Selemaya ji nlimanjom, Jadok ny-eelawer, nnea Levi no bo jo lung-e re Pedaya, bo jo kpur ekp'kpa nsol akuuru, fere lim Hanan mmona Jakur mmona Matanaya, á jol ekpeelee ebo, tibre ane baa ba, ane kahne re bo bahke ma

lim eltum nia. Bo ba bahke jo bak nsol ka anebe Levi abonanyehn ebo.

¹⁴ Esowo ebame, buum-m bade ejum jia, ka yini nsol nyi m ma lim a eltim eltim ename go etahk Esowo ebame, a eltum ni etahk Esowo.

¹⁵ Go afung nyao n jo nyehne anebe Juda go ebo ebge Efung Erekekv, bo jo akab nti yehke amahm, fere jo ko adonki ba sol nkohl, a amahm, agreb, afik, a ajoobo nsol nyako. Bo jo ko nsol nyia kpee ba go Jeusalem go Efung Erekekv. Owo n rehke bo re bo k'gungu nsol alehke efung bio.

¹⁶ Ane ba lohng go Taya, ba lene go Jeusalem jo ko nsahre a nsol are nyehko jo ba gungu anebe Juda go Jeusalem, go Efung Erekekv.

¹⁷ N kehm nyame atubesi ane ba Juda, kehm tongo bo re, <<Elkohn ebi ejum aji n kp'limi a, kp'limi Efung Erekekv re kp'kpe jol saang?

¹⁸ Nsol nyia sang babnsoo ewahre jo lima, nya wahnge Esowo ebahre ko ajoobo arem nyaa ba gbo tub-r a nfam ejahbe nyiaa? Anv n kp'limi Esowo á sahb b'bel erakatahng bada anebe Isreel, eji n kp'limi Efung Erekekv k'kpe jol saang.

¹⁹ N kehm tongo bo re, elgung nio ni bahke sene Efung Erekekv, ati mbu kpee nya Jeusalem jol bambam tete Efung Erekekv sehng. N yehke ane ebame bandiki bum re bo k'taame bo sol nsol anyehng anyehng yel go Jeusalem Efung Erekekv.

²⁰ Nkpel anyehng, afi nkpel ebal nyi abajenare a ane ba jo gungu ajoobo nsol nyako kpee kange no go ati mbu nyao nya Jeusalem, a nsol ebo.

²¹ N kehm nyame bo re, "Jenji wahng ka n kp' kange go akpe kpe akahme nya Jeusalem? N

l'kpe lim ano, m bahk-n bobo. Owo bo kehm rahke. Bomo ngare nyio bo kpeem jo ba Efung Erekekv

²² N kehm tongo anebe Levi re bo jo bum elbo saang, feere jo baabe ati mbu, eji Efung Ekerekv l'jo jol saang. Titi Esowo ebame tob buum-m ejum jia fvfo, wo tib-m ndon enya, go ega egburu elgoro.

²³ Ana jolo jol o, go afung nyao, n nyehne anebalum Juda ba ma ko anebkal ajahmjahm ba lohng go Asdod, Amon, a Moab.

²⁴ Ellong abon ebo nehko, jo bungu ejahbe ji Asdod, afi ejahbe ji ane bako. Bo joom ma bung ejahbe Juda.

²⁵ N kehm nyame bo, fere su bo. Egom jindiki n dv bo, fere tohng alv esi ebo woobo. N limi bo, bo ko nwongo go mbing Esowo, n kehm bungu tong bo re, n nehk kpe yake abon ebahne ba nkal re bo song bal abon ebo ba nlum, jol kane ko abon ebo ba nkal ka abon ebahne, jol wahn fono kana baange bo.

²⁶ Elkohn ajoobo mbal nyaa sang wahng ka ntula Solomon limi abiafema? Ntul awohng awohng go ejahbe ajehng ajehng jolem ana ye. Á koro Esowo, Esowo lim-e á jol ntul no Israel. Anebkal ajahmjahm baa ba lim-e re á gbo yel go abiafem.

²⁷ Anv, n kp'sebe re wahr wuk re, wahn fvfo n kp'tob lim amenng ab'bi ana nyaa, fere ten Esowo ebahre atung awuungu eji n kp'koko anebkal ajahmjahma?

²⁸ Mmon awohng no Joyada no nlum, Joyada ji jolo mmon no Eliasib ji jolo egburu nlimanjom,

koo mmon no Sanbalak ji lohng go Horon. N kam-e go egame elbohngo.

²⁹ Titi Esowo ebame, buumu bo, eji bo ma ranng e yake jia ji abalimajom, a anyam nya abalimajom a nya anebe Levi.

³⁰ N kehm limi abalimajom, a anebe Levi bo jol saang, go ejum ajehng ajehng ji ajahmjahm. N kehm bake bo ntum, nne awohng awohng go ege edi eltum.

³¹ N toobo ana ane bahke tahbe nkun ngare ngare a agbokombang akabenti. Esowo ebame, titi buum-m go ega ndon.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4